

Caso di tata acusa di a abusa diferente biaha su propio yiu muhe menor di edad posponi atrobe

ORANJESTAD – Ayera mainta diferente di e casonan den apelacion cu mester a wordo trata den Corte Superior, a keda posponi.

Redactor di casonan di Corte tabata mainta na edificio di Corte en espera di tratamiento di e caso penal contra e persona K., kende ta wordo acusa di a abusa diferente biaha di su propio yiu muhe.

Por a nota cu tabatin personanan caba cu a yega na edificio di Corte pa tambe presencia e caso pero e guardia di seguridad a informa cu e caso no ta 8.45 di mainta, manera anteriormente a kere sino te 10.30 di mainta.

Investigacion cu redactor di casonan di Corte a haci ta muestra cu e caso K. lo wordo posponi te pa Mei y e motibo pa esaki ta cu ainda e testigonan di parti di Ministerio Publico mester a wordo scucha na Hues Comisario no a tuma lugar.

Ta obvio cu si e interrogacionnan na Hues Comisario no a keda realisa manera tabata e palabracion luna pasa den Corte Superior, e no tin sentido pa sigui cu tratamento di e caso ayera.

Ta asina cu dia 5 di Februari 2009, K. a presenta dilanti Hof acompaña pa su abogado mr. Lotter Homan. Pafo di sala di Corte tabata e yiu muhe di K., kende lo a wordo abusa y tambe e mama di e victima. E dia ey abogado mr. Lotter

Homan a propone na Hues pa laga un experto Hulandes, evalua e procesverbaal di e caso contra e homber K. pa determina si e victima di inmoralidad y abuso sexual, ta papia e berdad.

Den e caso aki, e homber K. ta wordo acusa di a comete actonan immoral y tambe abuso sexual cu su yiu muhe di 12 anja. Den e serie di acusacionnan cu Fiscal a presenta, e ta describi cu K. lo tabata molestia su yiu muhe entre 2002 y 2004 y despues di 2004 te cu 2007.

Ta un periodo hopi largo cu K. ta wordo sospecha di a comete actonan immoral y tambe abuso sexual. Fiscal a splica cu e motibo cu e citacion ta asina largo ta

pasobra cu mester a usa e ley bieu y tambe e ley nobo. E ley bieu ta papia di actonan immoral di mucha bou di 15 anja mientras cu e ley nobo ta papia di mucha bou di 16 anja. Den e caso aki, segun e mucha e tabatin 12 anja ora cu su tata a cuminsa haci actonan immoral cune cu a culmina den e abuso sexual.

Despues di un discusion entre Fiscal y abogado riba si mester laga experto di Holanda evalua e raport of no, Hof a dicidi cu e lo manda e caso pa Hues Comisario caminda e lo kier scucha un total di 6 testigo.

E hecho cu e testigonan, entre otro e victima di abuso, no a wordo scucha pa Hues Comisario, e caso a keda posponi un biaha mas.